



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 7

J&K nem state jenjang
agütsütsü: CM Omar Abdullah

Russia-i Ukraine tesem balala
amakdang nisung 3 tepset: Zelenskyy

VOL. XXII ISSUE NO. 233 (ADOK 233)

DIMAPUR

KÜPTOKNÜ (SATURDAY)

AAMI (JUNE) 07, 2025

₹ 5.00

CTAN & NNQF-i tanü Public Dialogue ayonga agir

Kohima, June 6, 2025 (TYO): Combined Technical Association of Nagaland (CTAN) aser Nagaland NET Qualified Forum (NNQF) ajanga June 7, 2025 nü Public Dialogue ka ayonga agitsü.

Honibarnep 11:00 ako nung Angami Women Organisation (AWO) Hall Kohima nung iba sentong agitsü aser assistant professors 147 indang benoka lemsateptsü.

Hokolbarnü Kohima Press Club nung osangbener den jembidang NNQF züngsem Videkhono Yhokha-i "iba sentong nung public ajak adentsü akok aser Higher Education department nung mapa tazüng 147 aser competitive exams atema tebilembatem lemsateptsü" ta ashi.

Tan ita tetenzüklen requisition deadline tembangaka state sorkari ola madokba atema iba dialogue ayonga agitsü ta CTAN Convenor Meshenlo Kath-ia ashi.

"Onoki Department of Higher Education aser bangdak minister

den olemtep tajung ka linüa asü. Onoki parnok jaok saka parnok medentetsü ta ashi" ta Kath-i metetdaksü.

Department nung assistant professors 147 shimokba tetuyuba meyipa agiogo saka mapa tazüngtem NPSC nem ano magütsü lir aser asüng olemtep nung iba onük ya asütsü ta paisa ashi.

Iba sentong nung peace activist aser Forum for Naga Reconciliation & Initiatives of Change (India) züngsem Niketu Iralu, social activist & Kezekevi Thehouba and Searching Together general secretary Robert N Solo, GB, social activist & politician Kahuto Chishi aser retired professor & taoba Nagaland University pro-vice chancellor GT Thong nung er adentsü.

Sorkari tekaratiba nung mapa tazüngtem NPSC ket nung magütsüra kechi inyaksü ta asüba lemtet asüng senden nungsa agitsü ta Kath-i ashi.

Dimapur GBs-i ILP mapa offline inyakdaksünür

Dimapur, June 6, 2025 (TYO): Dimapur district nung Inner Line Permit (ILP) atema offline application tenzükang ta GB Union Dimapur (Sadar)-i Dimapur district administration dang mepishio.

"Online mode ajanga dang ILP agizükba nung timtem ajurur. Dimapur nung aliba non-indigenous nungeri online app junga amshitsü makokba ajanga khuretem ajurutsü. ILP maparen ya online system ajanga dang inyakra tetsükdaksü ajurutsü" ta GB Union Dimapur (Sadar) president W Kholie Kapfo aser

general secretary T Onen Jamir nati Dimapur DC dangi shidi ka züluogo.

District administration-i nübortem sadema inyaktetsü aser Dimapur nung ILP mapa takok ngua inyaksü atema shisadangsü mepishir ta parnoki ashi.

State sorkari Dimapur district dena Nagaland ajungalen ILP benokba ya kanga shitak aser iba lemtet pusema nungiter. Dimapur Sadar areas nung kodangsa ILP maparen inyakdir district administration den yariteptsü renema lir ta GB Union Dimapur (Sadar)-isa metetdaksüogo.

CM Dr. Rio-i State Emporium lapoktsü & Naga unity shawl sayatsü

Kohima, June 6, 2025 (TYO): Nagaland nung kin 17 aser sub-tribes balala indang sobalibatem wazüka ayutsüla aser ajungkettsüla ta Chief Minister Dr. Neiphiu Rio-i Hokolbarnü Nagaland State Emporium Complex lapoktsüdang ashi.

"Iba Complex ya mapang talangka nungi aginüa aruogo aser iba ya sobaliba maitsü den rongsenketzung renlokba center ka asütsü. Iba emporium ya Nagaland atema konang aser tamaitü ka asütsü aser iba ajanga Nagaland nung telongjem sayutsüla. Iba complex ya textiles aser crafts atema showroom ka dang masütsüla saka locals aser tourists-i sobaliba metetba tesem ka asütsüla" ta Dr. Rio-i ashi.

"Asen sobaliba sobusolemtüsü, sentüsü aser tapu khenyongi balaka lir anungji artisans, weavers, aser designers-i lateta aliba inyakyim kübok tajungtiba ajungkettsü ayongzüker" ta pai ashi.

"Inyakyim ka latetsüla aser designs agizüksüla, samples yanglutsüla aser iba sülen mass production asütsüla. Nisung ajaki kechi junger ta bilemer meyangludaksütsüla. Inyakyim tajung ka lateta meyura asen maitsü samar aser shishilembaba nunga timtem ajurutsü" ta pai ashi.

"Asenoki Naga nung er chiyungtsü ajungkettsüla. Delhi aser Pune amala yimitem nung tangari asenok chiyungtsü kanga sapua achir. Ingredients aser recipes jungjunga bendentsüla aser tajungba küma yanglushir tangar nem chidaksütsüla" ta CM Rio-isa ashi.



Chief Minister Dr. Neiphiu Rio aser Industries and Commerce Advisor Hekani Jakhalu nati "Naga Unity Shawl" sayatsüdang agiba noksa angur.

Asenoki Naga silk, banana fibers, aser traditional cotton amala amshitsüla aser raw material supplier ka nungi value-added producer akümtsüla ta paisa ashi.

"Asenoki raw goods yokba anendi aser yangi tembanger jenjang tajungba angutsü merangdi" ta Rio-i ayongzüker.

Northeastern handloom and handicraft sector nung Nagaland-i Assam aser Manipur ama state tem ano memenep lir ta paisa ashi.

CM Dr. Rio-isa Yarn Bank ka amenoktsü aser iba ajanga textile production pusema nungittsü indang tebilemba ka lemsatep.

"Iba mapatong ya Chief Minister Rio-i 2013 nungi tenzükba liasü" ta Nagaland Handloom and Handicraft Development Corporation (NHHDC) Ltd. Chairman Prasilie Pienyu-i ashi. NHHDC kübok tang emporiums 7 lir aser iba nung Delhi aser Kolkata yimitem

nung ana dena lir, ta pai ashi.

"Item Emporiums ya shishilembadak dang masü saka asen maitsü, tangatetba aser sobaliba sayuba tesemtem lir" ta pai ashi.

Nagaland State Emporium Complex ya azüklen menden trokben atongtepa atuba ki ka lir. State Emporium ya first floor nung lir aser floors asem nung shopping area, restaurant, library, conference hall aser guest rooms yanglua lir.

Iba mapatong ya Rs 11.25 crore endoka yangluogo ta Pienyu-isa metetdaksü.

Tanü iba sentong nung Chief Minister Rio den Industries and Commerce Advisor Hekani Jakhalu nati "Naga Unity Shawl" sayaogo.

Iba unity shawl ya tebur aser tetsürtem atema lir aser Naga maitsü sayua Naga motifs enoka lir. Iba sü ya mezüng Weaving Production Centre, NHHDC Ltd, Dimapur nung yanglua liasü.

Central Nagaland Students' Association 5 buba General Conference takok ngua mungogo

Dimapur, June 6, 2025 (TYO): June 5 aser 6, 2025 anogotem Central Nagaland Students' Association (CNSA) pur 5 buba General Conference liogo.

Iba sentong ya IMC Hall, Dimapur nung "Power of Possibilities" omen nung ajemdaker agi.

Anogo ananü sentong nung Naga major tribes asem- Ao, Sumi, aser Lotha nungi kaketshir lennirtem, teshimtet nübotem aser temeimertem aden.

Rural Development & SIRD Minister Metsubo Jamir-i sentong nung tongti tesemdanger ka ama shilem agidang CNSA-i iba mungdang ayongzükbä aser CNTC kübok kin asem longjemer inyaksangshia aruba atema tenüngsang agütsü.

"Kin aseme Nagaland nung lokti aser yimtenren den tamangba yimsü renlokba nung tongtipang shilem agiogo. Kin

asemi shisaliok, ketdangsübaren, aser missionary mapa tulu inyakogo" ta Metsubo-i ashi.

"Shisaliok ya jenjang ka atongba ama masü saka tarutsü yangertsü atema tashi aketba hadir ka ama benshitsüla. Lanurtemi shisaliok ya tajangzüker angutsü mesüra mapa inyaksü maongka angutsü ama dang bilemer, saka asenoki pei dak tamang akatsüla, temulung ulutsüla aser entrepreneur mapa inyaksü tangatetba alitsüla" ta pai ayongzüker.

Lanu putui sorkar mapatem dak teimla ayuba ajangeter pei sasa inyaka aotsü aser shishilembabaren tenzüksü tebilemba ayutsüla. Sorkari mapa ya ajak peritsüsa mali aser tejakleni aoba loktiliba ka nung sorkar mapa dak alia tanga lenmangtem shisadangsüla ta Minister Metsubo-isa ashi.

Kümtem süia arudang kin

asemi tajangzüker manguba aser züngdokba tensatem ajurua arur saka item khuret ajanga asenok rongnung tajungtiba asütsü aser aremzüksü tangatetba agütsüogo. Nagaland nung lanurtemi asen kintem maitsü aser senmangtem atema nüma atangtsüla, ta paisa ashi.

"Ao, Sumi, aser Lotha nung er tsüngda kati ka akhümtsübutepstüla aser külemi renloka aotsü atema longjemer inyaksüla. CNSA-i CNWA, CNTC amala teloktem pusema nungitba atema tenüngsang agütsür aser iba ajanga Central Nagaland nung lenisüba adoktsü aser taginübatem tongteta inyaksü" ta Metsubo-isa ashi.

CNSA President R. Sunep Pongen-i tir o jembidang 2022 nung lokti senden aliba sülen inyaka aruba osang lemsatep aser federating units 3- AKM, LSU, aser SKK ajanga maneni yaritepa

aser len anir aruba atema tenüngsang agütsü.

Paisa Central Naga kintem nungi candidates-i UPSC ama national competitive examinations nung takok ngutetba atema pelaba metetdaksü.

Sentong nung CNTC Joint Secretary Zuchamo Mozhui aser Central Nagaland Women Association (CNWA) President Atoli Sema nati salem osang lemsatep.

Sentong nung mendenji LSU President Lirhonthung E. Kithan liasü, Toluvi Ghami Baptist Akukuho Children Pastor Kuputoli A. Yeptho-i temoatsü meshia sarasadem aser DABA Associate Pastor Imnatoshi Longkumer-i sarasadema tembang.

Yashi CNSA lokti senden tenzükba sentong nung mendenji AKM Tir Lanutoshi Aier liasü aser MLA & Advisor, Labour,

Employment & Skill Development and Excise, Moatoshi Longkumer-i alaketa jaoker ama shilem agi.

CNSA-i kin balala nung kaketshirtem longjemdaksütsü merangba atema tenüngsang agütsür aser Nagaland tarutsü ya lanurtemi dang yanglutetsü ta Moatoshi-i ashi.

"Nagaland nung lanur aikati mapa mesüra higher education atema tangalen aoer. Iba ya local infrastructure aser mapa maliba ajanga lir. Kaketshirtemi maongka ataa melii maongkatem yangertsüla aser tila ka dang asü nunga tenzüka iba jagi pei taküm liteta aotsüsa inyaksü ayongzüker" ta pai ashi.

Iba sentong nung Kohima Law College Administrator Limaakum Jamir-i CNSA indang putiotsü tatsü ka lemsatep aser Lotha Hoho Chairman Er. Mhondamo Ovung-i salem osang aben.

Telungjem ajanga asenok indaktsür: Minister Metsubo Jamir

Dimapur, Aami/June 06 (TYO): Minister, Rural Development & SIRD, Metsubo Jamir-i central Naga tribes tem dang telungjem, pei sasa pei poksünga aser bendanga agütsür nübur tenzüka alitsü ayongzüka liasü.

IMC Hall, Dimapur nung Central Nagaland Students' Association (CNSA) indang 5 buba inti mungdang nung Hokulbarnü jembidang, Nagaland terenlok asoshi item kin asem mezünpur sür tongti shilem agiba indang pai nenshia ashi.

Akhi mapang nungi item kin yagi pei kin kisüng masü saka Naga nung ajunga animesor tenzüka aru, ta pai ashi.

Minister Metsubo-i lanurtem dang iba mapa tajung maneni anir ajemalua inyaksü ayongzüka aser asenok mezünpur sür aru aser tanüa asenoki Nagaland ya tajungba dangi anir otettsü, ta ashi.

"Telungjem ajanga asenok kati ka asoshi bilema inyaker. Telungjem ajanga asenok

indaktsür. Lotha Nagas atema kisüng masü, Sema nagas atema kisüng masü, saka asen Naga nung asoshi asenoki konang tetushi bener aru. Naga nung ama asenoki itemji inyaktetogo," ta pai ashi.

"Asen chirtemi literacy ya kenten-menü ka ama kumdaktsüba ngua temulungtip matemer. Shisaliok ajanga teimla masü tashi agütsütsüla. Kibur akumba ya lokti asoshi kanga majung. 'Yabo ni agütsüla' ta bilemba ya tim masü. Na degree aliba yong nü nem mapa agütsütsü sorkar mapa masü. Shisaliok ajanga nü nem jajatettsü, raratettsü, inyaktettsü tashi agütsür," ta Minister Metsubo Jamir-i ashi.

Linük nung Nagaland-i 'most literate state' jenjang pezü buba tongtetba indang jembidang, "Ibai asen tsürabur, lenirtem aser lanurtemi takok anguba lir. Saka shisaliok ya 'entitlement' mekumdaktsütsüla. Ibai nü tarutsü jenjang aser tia atema tashi aser hadir ka lir," ta pai ashi.

Pai kaketshirtem dang tawa semzüka Mission for Skill Development and Self-reliance densema rural schemes balala nungi tajangzüka agütsü ayongzüka.

Sentong nung CNSA tir R Sunep Pongen-i iba association tenzüka aser kin asem lungjemba nung timtem balala ajuruba indang jembia liasü.

"Asen taoba lenirtemi asen asoshi kechi ola adoktsü, aji meteta liasü. Parnoki takoktsü tashi amshi. Asenok lungjemtsü ya tamakoktsü ta nüburtemi ashi - saka parnok tangatetba tai kumtsü," ta pai ashi.

"Asenoki amanga jembiba iba mungdang nung yutsüti aser Nagaland telungjem asoshi inyakti. Ibai mungdang kisüng masü, ibai shisatsü, sobaliba aser mangdang dokdenba mapang ka südaktsüti. Iba yagi asen tajangshibatam lemsateptsü, tebilemstü lemsateptsü aser lungjemer arütsü alema oa inyaksü sapang ka agütsür," ta paisa ashi.

Chümoukedima district nung World Environment Day amung

Dimapur, Aami/June 06 (TYO): Chümoukedima district administration ajanga Chümoukedima Forest Range, Dimapur Forest Division den lungjemer June 5, 2025 nü Deputy Commissioner office complex, Chümoukedima nung World Environment Day munga liasü.

Iba sentong nung DC office kübok administrative officers & staff, Treasury office nungi ketdangsür aser staff, Passport Seva Kendra, Veterinary office, District Land Records and Survey, District Education, Forest Department aser 1st NAP nungi shilem tajung agia süngjang agütsüba süngdong, süngpak agütsüba, akum

agütsüba süngdongm beetel nut aser coffee tetong tema liasü.

Süngdong atemba den külemi libajen asoshi awareness agütsütsü atema lokti nübuttsük mapa inyaka liasü.

World Environment Day onük nung jembidang Divisional Forest Officer (DFO) ajanga sentong nung adenertem dang plastic mamshitsü yimya sübatsü aser libajen tajungba kumdaktsüba nung shilem agütsü ayongzüka liasü.

Künü nisung ajak transfer aotsü mesüra mapa nungi anisüngzüka angutsü, saka tanü asenoki mapa tilaka inyaka yutsüba yagi tajangzüka tulu angutsü, ta ashi.

CECS ajanga ak metsütsü training agütsü



Women Empowerment Livelihood Program ajanga June 5, 2025 nü The Naga Farm nung "Hands-on Learning in Piggery Management" ayongzüka agidang tangokba noksa ka yangi angur.

NSDMA-i Phesama yimtsüng semdanga teyari agütsü

Dimapur, Aami/June 06 (TYO): Tawa alinen alua tang tashi timtemba nung telangzüba agüja Home Department kübok Nagaland State Disaster Management Authority (NSDMA) nungi ketdangsür temi June 3, 2025 nü Phesama yimtsüng semdanga teyari agüja liasü.

Iba mapang ajungben

nüngdakba asadanga maneni teka amteper yariteptsü asoshi Phesama Village Council den sensaksema liasü.

Kasa mapang District Disaster Management Authority (DDMA), Kohima-ia alinen agi taolen mali anendaka aliba truckers nem teyari agütsütsü inyakteptar. Iba maparen ya Sub-

Divisional Officer (Civil), Jakham aser Phesama Youth Organisation lungjemer inyaker.

Maneni DDMA Kohima aser Phesama Youth Organization lungjemer alinen agi kongshiba ki o jen jangjatepba mapang lir. Parnoki asadangba nung ajemdaker teyari agütsütsü.

HSLC & HSSLC Toppers 2025 nem tenüngsang agütsüba sentong ayonger

Dimapur, Aami/June 06 (TYO): Nagaland Board of School Education ajanga Toppers/Rank Holders, MILs & Skill subjects nung takok anguba Heads of Institutions, HSLC aser HSSLC Examinations 2025 ctelemsa balala nung Governor's Awards angutsüpur ajunga dang sandong ka nung, Governor ajanga tenüngsang agütsüba sentong ka June 12, 2025 anüngdang 11:00 ako nungi tenzüka Dr. Imkongliba Ao Hall, Raj Bhavan, Kohima

nung alitsü, ta metetdaktsüogo.

Iba sentong nung Toppers, Rank Holders aser Governor's Awards angur ajak arua adentsü jaoker. Tesem mesü-menangba ajanga tsürabur aser Heads of Institutions tem tan atema mejaoker.

Iba dak sendakba nung Heads of Institutions ajanga pei school nungi takok anguba Toppers, Rank Holders aser Achievers tem dang iba sentong nung adentsü metetdaktsütsü sangdong ajanga ashi.

Sentong nung adentsü nisung tenüng tejangja list yanglur school ajanga nagaboard@gmail.com dangi June 9, 2025 nikongdang 3:00 ako tashinung mail asütsüla aser iba sülen Governor's Secretariat nem agütsütsü.

Tejaoker tem anepdang 10:30 ako tashinung iba tesem tonga arutsüla aser 10:45 ako tashinung mener alitsüla. Kaketshirtem pei school uniforms nung arutsü metetdaktsür, ta NBSE sangdong ajanga ashi.



Indian Red Cross Society, Kohima District Branch ketdangsürtem den külemi Councilors aser Bayavu Higher Secondary School, Kohima nungi Junior Red Cross züngsem temi June 5, 2025 nü World Environment Day munga High School junction, Kohima temeket nung lokti nübuttsük ayongzüka liasü.

Dimapur, Aami/June 06 (TYO): Community Educational Centre Society (CECS) ajanga inyakba project, Women Empowerment Livelihood Program nung shilem ka ama Azim Premji Philanthropic Initiatives (APPI) teyari nung tetsür parnok 20-i June 5, 2025 nü The Naga Farm semdanga liasü.

Shilem agirtem ya Asangma aser Kangtsung nungi tetsür pongu-ngu aser Tuli nungi tetsür ter liasü.

Iba sentong ya "Hands-on Learning in Piggery

Management" omen nung ajemdaker ak metsüba angazükdaktsütsü nükjidong nung ayongzüka liasü.

Iba sentong nung shisalen sayur ya The Naga Farm kibur Subonenba Longkumer aser The Naga Farm manager Zimik Tamreichan liasü.

Iba sentong nung live demonstration aser sensaksemba ajanga ak metsüba yimya, mürekmejuba, chiyongsü agütsüba yimyatem aser shishilempatsü asoshi kiset shiruru metsüba yimyatem angazüka liasü.

Mon nung Dharti Aaba Abhiyan atema senden amen

Dimapur, Aami/June 06 (TYO): ADC Mon, Pakon Phom lenisüba kübok June 6, 2025 nü Dharti Aaba Abhiyan (Awareness and benefit Saturation Camp) atema renemshiba asadanga senden ka amen, koba June 15-30, 2025 anogotem agütsü lir.

Iba senden nung sendaktepa aliba department ajunga aden, kong Pakon-i jembidang, iba camp ya village level/cluster level camp ajanga entitlement agütsütsüba lir, ta ashi.

Iba camp nung Aadhaar card, Ration card, Ayushman

Bharat card (PM- JAY), Domicile certificate, Kisan Credit Card (KCC), PM Kisan Jan Dhan Account, Insurance Coverage (PMJJBY/PMSBY), Social Security (Old Age Pension, Widow Pension, Divyang Pension), Employment and Livelihood Schemes (MGNREGA, PM Vishwakarma) amala agütsütsü.

Temsüa aliba nisung aser kibong nem item teyari agütsütsü asoshi sendaktepa aliba department tsüngta amalitep akatsü nüngdaker, ta pai ayongzüka.

भारत सरकार/GOVERNMENT OF INDIA
उत्तर-पूर्वी क्षेत्र विकास मंत्रालय/MINISTRY OF DEVELOPMENT OF NER
उत्तर-पूर्वी परिषद् सचिवालय/NORTH EASTERN COUNCIL SECRETARIAT
नांग्रिम हिल्स, शिलांग/NONGRIM HILLS, SHILLONG -793003
Website: <https://necouncil.gov.in>

No. ADMN-12011/1/2024-ADMN

North Eastern Council Secretariat-i **Deputy Adviser (Irrigation, Flood Control and Water Management) post ka (1)** atema tetemjen officers bushir aser ibaji Recruitment Rules nung aliba ama Deputation basis (short term contract densema) nung asütsü. Deputation indang sen aser tanga telatetbatemji mapang shia yanglushia DOPT indang O&M No.6/8/2009-Estt.(Pay-II) dt.17.06.2010 nung aliba ama latettsü. Cadre ketdangsertem/Head of Departments dang deputation basis nung tekeratiba nung inyakdaksütsü atema temsüa alir aser tejangrar candidates indang applications forward süjang ta mepishir, koba ajanga iba advertisement Employment News nung sangdongba anogo nungi tenzüka **anogo 60 tsüngda** tsünglanglen sign süa alir ketdangser ket atongtsü. Iba post osang tejangja, temsüa aliba telatetbatem, mapa atema tenüngdakbatem, arrshi küm telatet, qualifications aser nüngdakba experience ji tsünglanglen **Annexure-I** nung lir. Application Forms/Curriculum Vitae Proforma (**Annexure-II**) aser osang tejangja atema candidates dang NEC Website <http://necouncil.gov.in> nung repranga download asütsü metetdaksür.

APPLICATION DEN KÜLEMI ITEM KULI KAKETTEM NÜNGDAKSÜ.

- Agüja aliba prescribed format Annexure-II nung application ajak renema candidate-i sign asütsüla aser Cadre/Appointing authority-ia sign asütsüla.
- Tesüiba küm 5 (pongu) indang ACRs attested copies ji page shia nung inoktsüla aser tilaba agia Under Secretary to the Government of India mesüra iba dang nungi temaba ketdangser seal alitsüla.
- Integrity Certificate.
- Vigilance Clearance.
- Tesüiba küm 10 pa service indang major mesüra minor penalty certificate.
- Service records nung aliba ama candidate indang osangji reprangshiogo aser ajak shidak ta kuli asüba certificate.
- Cadre clearance certificate.
- Pei sasa attest asüba educational certificates.

निदेशक (प्रशासन) /Director (Admn.)
NEC Secretariat, Nongrim Hills
Shillong: 793003.
Ph. No.: 0364-2522647

Annexure-1

1. (a)	Post nungja	Deputy Adviser (Irrigation, Flood Control and Water Management)
(b)	No. of post	1 (one)
(c)	Scale of pay	Level 12 (Rs.78800 – 209200/-) of Pay Matrix of 7 th CPC.
(d)	Shimba inyakyim a ser temsüa aliba telatet batem.	Deputation (short term contract densema): Central Government mesüra State Governments mesüra Union Territories mesüra public sector undertakings mesüra Universities mesüra recognised research institutions mesüra statutory mesüra autonomous organizations kübok (a) (i) parent cadre mesüra department nung regular basis nung analogous post; mesüra (ii) parent cadre mesüra department nung shimba sülen küm pongu service inyakba, aser regular basis nung pay matrix leve-11 (Rs.67700-208700/-) mesüra iba denji kasa; aser (b) Item educational qualifications aser experience aliba: (i) Recognized University mesüra institute nungi Bachelor's degree in Civil Engineering (ii) hydrology planning mesüra investigation mesüra design mesüra construction aser water resources development projects inyakba nung küm ter experience aliba. (Deputation mapang (short term contract densema) den külemi deputation mapang densema (short term contract densema) iba appointment jakdang tanga organization kar mesüra Central Government indang department kar nung ex-cadre post ji küm pezü dak tali masütsüla. Deputation nung shimba arrshi kümji teimba agia (short term contract densema) application agizükba tatembangbuba anogo tashi nung küm 56 (tenemser trok) dak tali masütsüla.
(e)	Teinyaksü mapatem	(a) Region flood control development indang comprehensive programmes aser irrigation resources den soil conservation programmes dak sendakba nung Secretary, North Eastern Council nem shisa agütsütsü (b) North Eastern Region nung aliba state tem nung water resources study asütsü aser irrigation nüngdaktem aser tajemtzü tzü atema resources ketdangsütsü atema onük balala benoktsü (c) Tekalen shia aliba projects renemtsü. Item maparen dak sendakba ajak nung North Eastern Region nung aliba state tem den yariteptsü.

Note: Iba post atema tenüng agütsüba sülenbo tenüng agientsü atema candidate tem dang memelatsü.

Canada nung ayongzükba G7 Summit nung PM Modi adentsü

New Delhi, Aami/June 06 (Agencies): Tan ita Canada nung ayongzükba G7 Senden nung adentsü atema Canada Ato kilonser, Mark Carney-i Ato kilonser Narendra Modi jaokogo.

Hokolbarnü Ato kilonser Modi-i X ajanga, "Canada Prime Minister @MarkJCarney-i call asüba atema pelar. Tawa pai election nung takok anguba atema pa nem tenüngsang agütsüogo aser tan ita tatembanglen Kananaskis nung G7 senden nung adentsü ni jaokba atema pelar," ta metetdaksü.

Paisa, "Nüburtem tsüngda tesendaktep aliba democracy linüktem ama India aser Canada nati tashi tasen nung longjemer inyaktsü, akhümtsübutep aser külem nükjidong ajanga len anidaksütsü. Iba senden nung adentsü yongyar," ta metetdaksü.

Canada nung taoba Ato kilonser, Justin Trudeau-i Khalistani lenir ka tepsetba atema India nem tai tongloksüba sülen linük ana tesendaktep mejungi kümer lia tang Ato kilonser tasenba Carney-i G7 senden nung adentsü atema Modi jaoker.

G7 nung züngsem linüktemji France, Germany, Italy, United Kingdom, Japan, United States aser Canada linüktem lir. G7 nung European Union (EU)-ia shilem agir aser International Monetary Fund (IMF), World Bank aser United Nations-a jaoker.

Canada nung June 15 nungi June 17 tashi G7 senden amentsü, aser iba senden nung lenirtemi Russia-Ukraine tsüngda rara aser West Asia tensa densema alima nung kanga tongtibang tebilemstsü onük aika süoka o lemteptsü.

J&K nem state jenjang agütsütsü: CM Omar Abdullah



Reasi (Jammu & Kashmir), June 06 (Agencies): Hokolbarnü Jammu & Kashmir Chief Minister, Omar Abdullah-i J&K Union territory nem state jenjang tanaben agüjang, ta mepishi.

J&K nem state jenjang agütsütsüji Ato kilonser Modi-i dang inyakttetsü, ta pai ashi.

Katra nung Ato kilonser Modi-i Katra railway station semzüksüba sentong nung Chief Minister Omar Abdullah-a aden.

Iba sentong nungji Union Railway Minister Ashwini Vaishnaw, Lieutenant Governor Manoj Sinha aser Union Minister Jitender Singh nungera liasü.

Iba sentong nungji jembidang Omar Abdullah-i, "Tia kaa railway dak sendakba sentong tulu ayongzükba mapang shia ni-a adener. Anantnag rail station semzüksüba aser Banihal rail tunnel lapokba sentongtem nunga ni liasü. 2014 küm ni mezüng kümsük Chief Minister inyakba mapang nung na-a mezüng Ato kilonser aküm. Election tembangli na yagi aru aser Katra railway station semzüksüba liasü. Nai asemben tashi elections nung takok ngua maneni Ato kilonser inyaker," ta ashi.

Paisa, "2014 küm Katra Railway Station semzüksüba

sentong nung adener nisung pezüprongla tanü-a yangi lir. Manoj Sinha taoba mapang MoS (Minister of State) for railways liasü aser LG aküm. Ni state ka nung Chief Minister liasü saka tangbo UT ka nung CM lir. Ajisüaka tensa tajungba akümstsü aser Ato kilonser Narendra Modi-i J&K nem tanaben state jenjang agütsütsü," ta metetdaksü.

Hokolbarnep Ato kilonser Modi-i Katra railway station nungi Vande Bharat Express train ana tenzüksü. Item train ajanga Jammu division aser Kashmir na sendakteptsü.

Iba sentong jakdang Ato kilonseri train nung school tanur kar aser railway staff kar den sensaksema liasü.

Vande Bharat Express train ajanga Katra nungi Srinagar tashi senzüba mapang tajemba akümstsü. Gari ajanga Katra nungi Srinagar atongtsü atema ghonda 7 shi agir saka tangbo train service tasen ajanga yimti ana tsüngda ghonda 3 dang agitsü.

Item train ya India nung mezüngbuba cable railway apu-Anji Khad Bridge aser alima nung railway apu talangtiba Chenab Bridge na ajanga senzütsü. Apu ana ya-a tamalen Ato kilonser Narendra Modi-isa semzüksüba liasü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 07, 2025

Kin shia nütsüng sükdangtsü

India nung nütsüng yongsük sükdangba inyakyim ya küm ter shia khen agitsü lateter külen, tang tashi nung nütsüng yongsük sükdangba mapa ya 2011 tashi agia lir aser iba sülen 2021 küm agitsüba liasü saka Covid wara aruba ajanga magiteti süidaktsüba sülen, ano tang 2027 küm March ka nungi agi tenzüksü ta sangdongogo. 2011 küm nütsüng yongsük sükdang dang linük nung nütsüng ajak agi crore 121 dak tali liasü, anungji tangbo, ashiko, nütsüng crore 150 junga alitsüa akok. Atangji, nütsüng sükdangba mapa ya nisung tekolak aser tenüng dang asüngdanga sükdangtsüba masü saka tangbo nisung shia kin kidong, rongsen aser tazüng temetetba jenjang, pei inyakba mapa aser küm nung senotsü kwibo ajangzükteter ta asüba temetetsütem ajak asüngdanga sükdangtsü. Akhidanga nütsüng yongsük sükdangba mapang nütsüng dang masü saka Scheduled Castes (SCs) aser Scheduled Tribes (STs) purtem den tamangba yimsütema asüngdanga züluden saka tangbo SC aser ST-temji dang masü saka tanga Other Backward Classes (OBCs) aser ano tang OBC nung züngsema maliba kin (caste) tilatema ajak pei kin tenüng nung zülüoktsüsa inyaksü. Atangji, India lima ama alinük tulu aser kin kidong aser oshi zünger mezüngma aliba lima ka nung kin kidong tapu ajak benteta züngdangtsüba mapa temela masütsü, ajisüaka akokba tashi kin tila tulu ajak pei taküm tia aser jenjang yari yimtenia repranga anepalutsü asoshi itemji metettsü nüngdaker. Ano, ajaki metetnübaji India lima nung tanga tamangba yimsütem yutsür Muslim nunger nütsüng yongsük arenba metetner, kechiyong tangar kibong shia nung tanur ka mesüra ana dang asotsü merang dang, parnokbo tetsür asem pezü agir tanur kecha tatazük maka sojen sodaktsür, iba jagi tangar kibong nung tanur ana asodang, Muslim nunger kibong nungbo tanur ter asor. Aji oda, kodang tangarbo nütsüng ajemtsü meranger saka kin kabo nütsüng renloktsü meranger ta südir, iba jagi yimten aser lokti maparen aika nung lirumemedemtsü. India yimten nüchiso ngur külen 1953 küm nütsüng yongsük aser kin kidong sükdangertemi India nung kin tapu balala ajak agi 2300 süktet, ajisüaka item ajakji kin kaka ama züngoka amshitsüba tamakoktsü liasü, anungji ajibo tamasayongi magizük, kechiyong kodang telok mejeta ka nem kin ka ta balaka nüngja aser temeten agütsüdir, tang SCs. STs aser OBCs purtem nem agütsüba maongka aser teyari ajak agütsütsüsa akümstsü aser tatar menden nunga kin shiaji züngoktsüsa akümstsü. Item ajakji bilemdanger, linük nung takar, tashitemteter aser temaba jenjang nung aliba kintemi ajemoka toktsüba ajanga tejakleni moutetba kin tilatem kar ajioka parnok kar nem SC, kar nem ST aser kar nem OBC jenjang agüja nungiter. Aji oda, 2027 küm sükdangba nütsüng yongsük rongnungji kin tila tasen aika tenüngteta zülüoktsü, anungji iba sülen linük nung OBC aika akümstsü. Ibaji dang masü saka nütsüng renlokba aser ajemba yari state ajak nung Assembly aser Parliamentary tatar menden asetshiteptsü. Anungji, tang Lok sabha nung tatar menden ajak agi 543 aliba nung ya ano menden aika bendenloktsüsa akümstsü. Kasaji, Nagaland nunga assembly mendentem ya nütsüng yari asetshiteptsüsa akümstsü, idangji district kar nungbo ajemtsü aser kar nungbo teimba akümstsü. Item mapa ajak nungji asenoki kanga temulung agüja asen alidak asen nung zülüodaktsütsüba kanga tongtibang asütsü. Atangji, mapa ajak nübo agi dang inyaksü, anungji ajaki nütsüng aika aginer. Ajisüaka, asenoki kwi aginer ta masü, asenok nem Tsüngremi kwi maoja ali, ibajang ochishia züngshitsüba tongtibang asütsü, kechiyong Tsüngrem tsüngdangbo aika asüba agi masü, ochi agi dang akoker.

OLEMSABANG

Tarutsü putu asoshi tanü lipuküm jenjang

Miss. Yapanginla

Source: Otongdar

Tanü asen lima lipuküm jenjang tamajungba akümba angur. Iba tatalokba ya asenoki tzü aser mopung nung tejangja angur, arem aser ali samaba nung angur, ayong aser tzüym menena akümba nung angur. Iba khuret ya tanü atema dang masü, saka tarutsü putu (future generation) asoshia tebilemtsü lir. Asenoki item lipoküm tebilemtsütem ya kanga lendong ta agitsüla. Iba alima ya aneptsü asoshi asen kiroluro (economic life) aser lipuküm tayimdong (environmental commitment) ji külemi mapa inyaksüla.

Tanü Lipuküm Tensa (Ecological Crisis)

Development tenüng nung nisungi lipoküm ya mebilemdangi raksatsür. Meimchir ya Tsüngremi yanglu aser pai asenok nem teinyaktsü aika nünglokja lir. Item teinyaktsütem rongnung tongtibang kaji, iba alima anebalutsüba ya lir. Saka nisungeri iba alima ya teraksa agi bener arutsür.

Tazüokba melie dang shiruru aser süngdonglidong raksaba ajanga sen ecosystem nung tataktet (balance) melie kümogo aser iba yagi meimchir nem takoksa jenjang bener arutsür. Asenoki mekümdangi iba alimai moatsüba rongsentem talubosa amshir aser asenoki iba alima ya tamashi nung dang yimsü asür. Asen meimchir ya tangar dak nendaka/semloka (inter dependent) aliba takümtem lir, asenoki asenok kisüng dangbo iba alima nung melitettsü, saka asen libaliro nung asenoki iba ya meshisadanger. Asenoki lipuküm nem akhümtsübu magütsüba ajanga taküm jenjang (quality of life) kanga ajema kümogo.

Tanü nisungtem aikadi linük ajaklen lipuküm teraksa jenjang ya ngua iba alima rongsen ya taoba mapang ama sensa-masaa mamshitsüla ta angateta arudar, aser tanishir aikadi iba mapati nung temulung agüja akümer aser tetangshi nisungtem telemsa (discipline) balala nungi iba asoshi study süa kümogo.

Iba tensa ka nung, teyangluba (creation) ajak külemi tashi kangshia anüngdang (Rom 8:22) asen khristian tema laishiba ratetba ajanga iba tatalokba yanglushitsü merangdanga arudar. Lai tekong rasaba nung, laishir (biblical scholars) temi lai otsü aser tanü tatalokba lipuküm tasüngdangba (ecological questions) tem tsüngda nung tesendaktep bener arutsü meranger. Iba terasaba nükjidong ya, nisunger talisa khristiantem asoshi tangatetba agütsütsü aser lai o azüngba dang masü saka mapa küma (praxis) alima nung teyangluba (creation) ajak anepalutsü bushiba lir.

Iba ecological issue nung ajemdaker lai o meyipba reprangshiba ya khristian lokti (community) aika nung lendongsa kümogo. Iba Eco theology ya tanü nüngdakba bushiyim ka kümogo aser iba terasaba amshiba ajanga scholarlemi lai tekongtem koba nung teyangluba (creation) aser lipoküm (nature) indangshia lir, ibaji bushiteta azünger (e.g., lipok 1-2; 69; Levi 25; Yob 37-39; T.Ken 8; 19; 24; 98; 104; Isa. 9-11; Mat. 6:28-30; Rom. 8:18-23; Kolosi. 1; Jungkai Adok. 21-22). Tsüngremer Alima Tajung Laishiba nung yamai Ashir, "Aser Tsüngremi pai yangluba ajak angu, aser ajiang, ya kanga junger liasü (Lipok 1:31). Kotak aseralima, anü aser ita, ali aser tzüym, angu aser ozü, shiruru aser nisung ajakji tajung liasü. Iba alima ya teyangluba (creatures) ajak nem agütsüba lir, atangji Noah tezüngzüktepba nung teyangluba (creature) ajak liasü (Lipok 9: 9-11). Tsüngremi pai yanglubatem ajak anepaluba (nurture) ya kuli asüadang jangratemtsü lir aser tetenzük nungi meimchir aser teyangluba ajak sendaktepa alitsüji Tsüngremer sentong liasü. Alima rangpen telungtet ajak Tsüngremer temeshi nung shilem agir aser alima nung aliba ajakji Tsüngrem den sendaktepa ali nung ajakji temeshi (sacred) lir.

Laishiba nung Tsüngrem, pa alima nung teyangluba ajak nung atenba aser tesendaktep aliba (showing himself through his creation) kuli angutsü. Pai mi nung adoka sayur, mopung nung alir aser tzü nung ajurur. Lipok kaket nung "Kibuba Tsüngremi ali agi nisung yanglu" (Lipok 2:7; 3:19) ta shia lir. Tenüngsang ken nung Tsüngrem nem alima telungtiba nungi tetsübuttsüka aser tesüngmangtsüka yangluba asoshi tenüngsang agütsüba angutsü. (T.Ken 139: 14-15). Tenüngsang ken 148 nung asenok iba alima den tesendaktep (intimacy) aliba asoshi tepelatsü aser tenüngsang agütsüba shia angutsü (mi aser rür, rürjeb aser tzü tangula, tenemti aser ungsem) aser tekong aika nung Tsüngremi apitetba, sayangtetba koba agi pa nem aküm aser tenüngsang bener arutsür iba indang tasüng alitsü. (T.Ken 19:1-7; 98:7-9; 104:1-5, 13-25; 148:3-13). Tasen lai nung, Yisu khrista tesayubatem kodang zungdir, Pa oshi nungji ecological tetuyuba angütsü. Pai ozütem aser labu naru, ayi, item ya amshia alima achaayangtsü osang bena liasü. Anungji asenoki iba lai tekongtem ajanga angatetbaji, Tsüngremi pai yanglubatem (nature) ajanga meimchir den anasa arütsü meranger.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Jesus Pulse aser Korean Choir-i longjemer sentong ka agi



Central London nung Jesus Pulse tentetsang, Alistair Knight-i sayutsüngidang tangokba noksa nung angur. Kasa noksa nung Korean choir 'Zion Mission' züngsemtem angur.

June 06, 2025: Vancouver, Canada nung aliba Korean choir 'Zion Mission' nungi züngsem 140-i British nunger sayutsüngir ka den longjemer central London nung moapu nung outreach sentong ka agiba sülen nisung 52-i Khrista agizüka liasü.

Kasa sentong nungji osangtajung kaket tila (gospel tracts) 8,000 lema agütsü.

Taoba ita iba sentongji South London nung aliba Pentecostal Arogo- London Shepherd Church-i ayongzüka liasü. Iba sentong tembangba sülen Royal Albert Hall nung sentong ka ayongzüka agi, John Bunyan leper aser John Wesley asoba tesem semdanga liasü.

Korean choir jagi Methodism tenzüksang, John Wesley asoba tesem semdang aser sayutsüngir, John Bunyan indang leper semdanga yangji Tsüngrem külema liasü.

Iba sentong nungji Alistair Knight-i sayutsüngia liasü. Pa ya Jesus Pulse ministry tentetsang lir. Kobi melii Jesus Pulse ya UK nung registered charity ka akümtsü.

Osangbener den jembidang Knight-i, "Ni sayutsüngirtem team ka anir, London nung aliba yimti lenmangtem nung outreach sentongtem ayongzüka agir aser onok indang digital aser prayer ministries ketdangser," ta metetdaksü.

"Ni tesayur mapa inyaker, training agütsür, sarasademtsür aser lenmangtem nung sayutsüngir. Laishiba nung tera yanga lir, Tanela nem anidaksür aser Tsüngrem yimli atema süngjang tangtsür," ta pai metetdaksü.

Tawa London tiyong nung agiba outreach sentong nungji Canada nung aliba South Korea nunger choir aser UK nung aliba Arogotem nung choir temi shilem agia liasü.

Knight-i, "Onok tsüngda telongjemji balaka liasü. Parnoki ken aten tenzüka mapang ibaji ken atemba dang masü saka mezüja shimtetba liasü. Nisungtem tejajadak mapang nung anener ken angaa liasü aser aika kongshia liasü. Iba

tesem nungji Tsüngrem adenba onoki meteta liasü," ta metetdaksü.

"Tekülem agiba ola jagi anüing asüng. Yisu Khrista temeim aser taochi kentem ajanga yimti tiyong ajak metanga ao. Kobi melii lokti tulu adenshia liasü," ta pai ashi.

Iba mapang nungjagi tenzüka Knight-i sayutsüngi tenzü. Knight-i kanga tasü itta sayutsüngi. Pai pa taküm shi jangraba nung jabujaria aliba den külema temesepba mozü yoka liasü, ajisüaka Yisui pa kümzüka taküm kuli lemsatep.

Iba sülen ang pai Laishiba nung ajemdaker tekümtet osang lemsatep. Osangbener den jembidang pai, "Ni kü taküm kuli lemsatep aser Khrista osangtajung lemsatep. Menenpurtem kümzüksü

atema Yisu Khrista alimai aruba, asen menen alangzüksü atema Pa Kangki nung asüba, Pai tatok agütsüba aser tamanger ajak nem tatem maka taküm agütsüba indang ni lemsatep. Ni kü melungjang taroktiba nungi jembia ni tamang tia nung aliba, temesepba mozü ayokba aser temenen nung asonga aliba indang lemsatep. Ni arrshi küm 18 asüba mapang nung Yisu Khristai ni kümzü. aser kü taküm khenyongi balaka melenshitsüba indang ni lemsatep," ta ashi.

Paisa, Jesus Pulse-i maneni item ama sentong aika ayongzüka agitsü, ta metetdaksü. "Onok mission nung toklang sayutsüngir 8,100 lir aser alima nung aliba tongtibang yimti aika nung parnok lir," ta paisa metetdaksü.

CURE International aser Biblica-i Laishiba 87,000 lema agütsütsü

K h r i s t a n ministry- CURE International indang hospital ka nung shiranger tanur ka aser par tsürabur nati L a i s h i b a anguba sülen tangokba noksa nung angur.

talisa temang shilem balala agi matamabensartem surgery agitsür.

1996 küm CURE International tenzüka sülen parnoki surgery 330,000 agitsüogo aser Khrista osangtajung agi nisung million 2.1 ayimjemogo.

Osangbener den jembidang CURE International CEO, Justin Narducci-i, "Ozü telok tenzüker mezüngpurtemi tanurtem nem world-class medical care agütsüba den külema world-class ministry care liromedema agütsütsü mangdang yur inyaker," ta metetdaksü.

Mezüngpurtemi Luk 9:2 nung ajemdaker organization indang mission tenzüka liasü. Iba Lai tekong nung Yisu Khristai Pa nütsüngtem dang Tsüngrem O lemsateptsü aser

ANOGO ABEN TSÜNGREM DEN

Taochi agi sünga aliba Tsüngrem

Aser shirnok teti tatem maka taküm asoshi Pa dak amangtsü, parnok dang tatishitsü asoshi, Yisu Khrista Pei talangka aremzüka ajak kü dak, tongtiba ama, jungkai adokba sayutsü aji asoshi ni yimlibilem angu". 1 Tim. 1: 16.

Tsüngrem taochi agizüker rongnung Paul-a liasü. Damaska lenmang nung Tsüngremi tesümgangtsü inyakyim sayu. Kari ashir, Pauli temenen ulura mena nung iba anogo nung, "Tsüngrem, temenenba dang aochiang!" ta Pauli ayimten. Saka iba anogo nung tayimtenba mali asü, kechiaser kodang Khrista kangki nung asü Tsüngremi taochi talubosa sayuadok. Khrista ajanga Pa dangi arur ajak dang Pai talubosa taochi agütsür.

Taochi dak alaka Pa tanga ka asütsü makok, kechiaser ibaji Pa jakla lir. Asenok ama Paul Tsüngrem taochi tzülok nung noktak aser iba tzüsem nung chigua meshitet. Temenenpur kati Tsüngrem dangi arua Pa taochi agujang ta mepishitsü kecha tarendaksü mali. Pa taochi ayimba tetangdang mali; kechaia noktangtsü makok ayimer!

Nisungi iba ayong jagi arutsüla, kechiaser yangji meshitoktettsüsa kecha temenen mali, memerüktettsüsa ar kecha mali, tamakok kecha teti asoshi mali, aser Tsüngrem taochi metongtettsüsa aibelen kecha mali ta angatettsüla. Tsüngrem taochi-i ajak meshitettsür. Tayindangba sü shidangogo. Kümtetdakba taochi menden nung mena lir, koba nungi ayong ayimer; shirnoki tamang agi pungok ajak shidoktsür.

shirangertem aneptsütsü nungdabapurtem nem taküm tetuyuba agüja liasü, ta paisa melenshidaksüba Laishiba metetdaksü.

Narducci-i, Yisu Khristai shi-mang nung shirangertem aneptsüba dang masü saka tanela asentenshitsü atema-a maongka agüja liasü, ta ashi.

"Ibayongji CURE International den ministry surgery doctor 60 lir aser parnoki anogo shia surgery agitsür. Iba denji külema onoki Khrista osangtajung lemsateper," ta Narducci-i ashi.

Biblica ya 1809 küm tentetba sülen küm aika ministry mapa inyaka arudar.

CURE International aser Biblica nati longjemer inyaksü bangjemogo, ajisüaka nungdakba maparen aika inyaksü anüngdaka lir, ta pai ashi.

Laishiba 87,000 lema agütsütsü atema CURE International aser Biblica nati tetenlartem nungi aruba nungi senotsüji kasasa lemdanger indoktsü.

Rong nung Laishiba shibelenba aser lemsüba densema tanga nungdaktem balala nung dollar sen 500,000 shi adoktsü, ta Narducci-i metetdaksü.

Biblica Tir aser CEO, Geof Morin-i, "Onoki inyakra tiyongtsüji Kibubar yimli atema longjemer inyakra lir. Laishiba

nungdabapurtem nem taküm melenshidaksüba Laishiba lema agütsütsü atema asalentong tsütsü partners nungdaker; Yisu Khrista teka aser tetsüng ama tenzükertem nungdaker," ta metetdaksü.

"Ibayongji CURE International den ministry partnership tasen yangluba atema onok kanga pelar. Parnoki Khrista tiyongtsü südaksür tanurtem aser parnok kibongtem yaria Tsüngrem taneptsüba temeim mapa inyaker. Tanurtem aser parnok kibongtem nem Laishiba lema agütsüba ajanga nungdabapur meyirjang aikati Yisu Khrista temeim ajangshitsü aser tesünep angutsü, ta onoki imlar," ta metetdaksü.

CURE International chief ministry officer, Earnest Kioko-i, CURE International-i tenzüka nütsüng shilem 75 ket nungbo pei oshi nung Laishiba lir, aser ibaji Biblica den longjemer inyakra ajanga lir, ta metetdaksü.

Tanurtem nem angati treatment agütsüba hospital tem nung treatment agiba mapang nung tanur aikati Khrista agizüker. Parnoki hospital toktsür aoba sülen-a ministry-i maneni parnok Bible study tembang agidaksür.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim

Tenset

- (v) süng taju agi shiruru dak tua südaktsüba (slaughter with a pointed object)
* Onoki ak chanu ka tenset.

Tenshitenra

- (adv) kenten olasü tapu balala adoka atenba (singing as if practicing)
* Onok kar senteper ken kar tenshitenra-a ataa liasü.

OLONG PAITEP # 7174

	1			2					3
4			5						
					6				
7							8		
9							10	11	
12									
							13		
14									

TIPIEN

2. Tambur makümba mapang - (7)
4. Aon mali - (4)
6. Tetsüng tsünglanglen - (6)
7. Reprangdaktsü - (4)
8. Shiruru apuba - (4)
9. Ya - (4)
10. Yangkhu - (4)
12. Kisüng / Tesa - (6)
13. Lenmang aika nungi - (4)
14. Aou nung chiyongtsü asenba - (7)

LANGTSÜNGLEN

1. Ashiba meinyak - (5)
3. Teberem nung benlok - (5)
5. Tenük agi penzü - (4)
6. Tekolok tajung - (7)
7. Nguyutep - (7)
10. Ki meketbangba - (4)
11. Lemdang - (5)

OLONG PAITEP # 7173 TELANGZÜBA

TIPIEN :

1. Tajang, 5. Berem, 6. üng, 7. Nati, 9. Asü, 10. Tamagitsü, 12. Sak, 14. Joko, 15. Nga, 16. Anüng, 17. Tzürem.

LANGTSÜNGLEN :

1. Takar, 2. Jongdak, 3. Teki, 4. Lemtsü, 8. Tai, 9. Asangur, 10. Talang, 11. Aso, 13. Taküm, 14. Jung.

NAI-A YA METETTER MA



Geologists-i Western Australia nung mineral deposit aika ngutetogo aser iba ya iron ore deposit tulutiba asütsü akok ta ashir. Australia kübok Hamersley region nung ore 55 billion metric tons shi ir aser iba nung iron concentrations 60% tema lir aser sen \$6 trillion jungnua indang asütsü aser global mining industry atema temelenshi tulu bentsür arutsü ta scientists-i ashir.

GOVERNMENT OF NAGALAND OFFICE OF THE CONTROLLER OF LEGAL METROLOGY & CONSUMER PROTECTION, NAGALAND, KOHIMA.

NO. CLMCP/APTT(MEMBERS)39/2021

Dated Kohima, the 06th June'2025.

ADVERTISEMENT

Applications are invited from the indigenous inhabitants of the state & respective districts only for filling up the vacant post of Members, District Consumer Disputes Redressal Commission (District Commission) in the vacancy listed below.

Sl. No.	District/office	Designation	No. of vacancy
1.	Kohima District Consumer Disputes Redressal Commission (District Commission)	i. Male Member	1 (One)
		ii. Lady Member	1 (One)
2.	Peren District Consumer Disputes Redressal Commission, (District Commission)	i. Male Member	1 (One)
		ii. Lady Member	1 (One)
3.	Tuensang District Consumer Disputes Redressal Commission, (District Commission)	i. Member (Male)	1 (One)
4.	Mon District Consumer Disputes Redressal Commission, (District Commission)	i. Male Member	1 (One)
		ii. Lady Member	1 (One)
5.	Kiphire District Consumer Disputes Redressal Commission, (District Commission)	i. Male Member	1 (One)
		ii. Lady Member	1 (One)

Criteria/Qualification for appointment of the Members, Nagaland State Consumer Disputes Redressal Commission (State Commission) and Members District Consumer Disputes Redressal Commission (District Commission) are based under Section 4(2) & Section 6 (1-13) of the Consumer Protection (Qualification for appointment, method of recruitment, procedure of appointment, term of office, resignation and removal of the President and members of the State Commission and District Commission) Rules, 2020 is mentioned below:

A. Qualifications for appointment of Member of District Commission:

(1) A person shall not be qualified for appointment as member unless he/she: -

- (a) is of not less than thirty-five years of age;
(b) Possesses a bachelor's degree from a recognised University; and
(c) is a person of ability, integrity and standing, and having special knowledge and professional experience of not less than fifteen years in consumer affairs, law, public affairs, administration, economics, commerce, industry, finance, management, engineering, technology, public health or medicine.

B. Term of Office:

(a) The Member of the District Commission shall hold office for a term of four years or up to the age of sixty-five years, whichever is earlier and shall be eligible for re-appointment for another term of four years subject to the age limit of sixty-five years.

C. Honorarium:

(a) The Member of the District Commission shall be paid an honorarium of Rs. 10000/- (Rupees ten thousand) only per month.

Interested person may submit their applications with all relevant documents to the Joint Controller, Legal Metrology & Consumer Protection Department, near Agri Office, A.G. Colony, Kohima on or before 18/06/2025, after which no application will be accepted.

Sd/-

(LIMATOSHI JAMIR)

Joint Controller

Legal Metrology & Consumer Protection
Nagaland, Kohima.

Guwahati nung "death of nature" sentong ayonga agi

Guwahati, June 6, 2025

(Agencies): Alima tesem balala nung World Environment Day 2025 amungdang Guwahati nung tebilemtsü abenba sensotem, kaketshirtem aser political party tanishirtem külemi "death of nature" ta ser lungkak aitba sentong ka ayonga agiogo.

Assam sorkari tawa terenlok mapatongtem inyaktsü atema lipoküm raksaba anema civil society-i iba sentong ayonga agi.

Parnoki sorkar dang Dighalipukhuri tzüküm nung süngdongtem atsüngba anentsü, ozüng alema süngdongtem belenba anentsü takhangba agütsü. Parnokisa South Kamrup nung Dorabil kümzüka ayutsü aser Dorabil nung shiruru chiyimba ali 150 bighas agütsütsü lemtet meyipa agitsü shiogo.

Dighalipukhuri nung lungkak aitba sentong agiba ya tongtipang lir kechiyong yaküm kaketshirtem aser telok balalai iba atema lungkak aitba sentongtem agiogo. Assam sorkari Handique College anasa awatsüng meketa aliba süngdong tejen aika tsüngdoktsü lemtetba anema parnoki lungkak aita liasü.

Telok balalai lungkak aitba ajanga sorkari lemtet meyipa

agitsüsa aküm saka iba ya masüadang anogo ana tejakdang administration-i Dighalipukhuri jakdang süngdong 70-80% tsüngdok ta activists-i ashi.

"Iba sorkari okadak iba tesem nung süngdong metsüngdoktsü ta nangzüker aser ajungbena aonung süngdong atsünger" ta scientist Dinesh Goswami-i ashi.

Asenoki khenkhen süngdong tilattem belentsü akoker saka süngdong tejentem atema "special process" ka nüngdaker aser ketdangpurtemi ya miima meinyaktsüla ta pai ashi.

"Iba mapa ya tezüpa asübo parnoki tashishitsü melii inyakra. Nisung ajak züngyanga alitsü ayongzüker. Sorkari süngdong tulu aser tejentem belener ta shia public anisar kechiyong asangsang nung süngdong tulutem belenba sülen kümzüksüba 50% dang lir ta Goswami-i ashi.

"Asen linük renloksüba ya common people atema masü. Terenlok ya Ambani-Adani atema lir. Anungji asenok ket nung lungkak aitba hadir lir aser külemi longjemer akokba tashi lungkak aidi" ta educationist Manorama Sharma-ia ashi.

"Lipoküm raksaba ya

Guwahati atema dang masü saka Assam atema khuret lir. Alima nung terenlok marudang alima raksabaji Assam ya ka asütsü. Terenlok atema sentong meyanglungdang tamasa alima raksar" ta Sharma-i metetdaktsü.

Guwahati nung Jalukbari nungi Khanapara tashi "silane road", Ujan Bazar beautification, MLA residence, Zoo Road, aser Six Mile amala yanglungdang süngdong 3,000 shi tsüngdokogo ta tanü lungkak aitertemi ashi.

Tanü lungkak aitertemi Assam Pradesh Congress Committee (APCC) headquarters-i oa memorandum ka agütsü. Iba memorandum nung opposition political party temi amalitep alitsü aser lungkak aitba nung yariteptsü mepishia lir.

Iba teshimet telok nung Apurba Kumar Barua, Manorama Sharma, Dinesh Goswami, senior journalist Mahesh Deka, human rights activist Pooja Nirla, trans activist Milin Dutta, aser tangar aika dena lir.

Sentong nung Congress lennir Mehdi Alam Bora, Joint Secretaries Rituparno Konwar aser Biman Gogoi nunger aden.

Manipur nung Hoolock Gibbons & Hornbills kümzüka ayutsü

Imphal, June 6, 2025

(Agencies): Manipur nung Naga nunger teimba ser aliba district tem aser talisa Assam, Nagaland, o Myanmar den arrtsüa alidak shiruru kümzüksü aser wazüka ayutsü tayongzüka tulu ka agütsüogo.

Tangkhuil Naga Awung Long

(TNAL)-i parnok telongtet ajungalen Hoolock Gibbons (Yongmu) aser Hornbills (Langmeidong) shikariba, shibelenba aser yirutsüba ajunga noktangba metetdaktsüogo.

Manipur nung shikarir, morok mi aser süngdonglidong

tsüngdokba ajanga Hoolock Gibbon aser Hornbills samaa aoer.

Iba tenokdangba ya Manipur nung district 6 kübok yimtsüng 252 ajak atema lir aser tashi mangartem dak tapet temerenshi agütsütsü ta TNAL-i metetdaktsüogo.

Israel-i Gaza nung Hamas anemba telok yarir: Netanyahu Jerusalem, Aami/June 06 (Agencies): Gaza Strip nung mitkar temi asendenshir amakdang Palestine nunger nisung 52 tepsetba sülen, Israel Ato Kilonser Benjamin Netanyahu-i Gaza nung Hamas den raraba nung yaritsü asoshi par linüki 'armed gangs' tem amshir ta ashi.

"Security ketdangsür" temi shisa agütsüba nung ajemdaker sorkari iba tesem nung tashi tait local clans tem "activate" süogo, ta Netanyahu-i ashiba video ya X nung Brehostibarnü post süja liasü. Tashi tain kibong tem nung ajemdaker Palestine nunger telungpur telok yarir ta yimjak nung sangdongba ibai mezüngbuba alitsü. Item telok yagi mapa tamajung inyaker aser trucks nungi teyari osettem auyar ta aid workers temi tai tonglokja lir. Netanyahu-i ashiba telok tem rongnung Popular Forces ya ka lir ta Israel ketdangsür kati ashi, koba Rafah nung local clan lenir Yasser Abu Shabab-i anir lir. Tawa ang Abu Shabab telok yagi online sangdong ka nung, Gaza Humanitarian Foundation (GHF) ajanga US aser Israel teyari nung lapka aliba distribution centres tasen temi teyari oset bener yokba kumzüka ayur, ta shia liasü. Mitkar temi iba linük tzükumlen tesem ajunga nung maka nüburtem ajunga yasa-

tzüradaktsüba mapang Netanyahu-i iba sangdong ya agütsü. Taoba hopta nungi tenzüka GHF ajanga lapoka aliba aid distribution sites nung nisung 100 dak tema tepseta ano tali ang yirutsüba asoshi linük balalai aitsür, kong Israel sepaitemi taoba hopta pezüben tashi Palestine nunger teyari oset abener arur dak injang khalokja liasü. Gaza nung Gaza Humanitarian Foundation ya "human abattoir" ka kumdaktsüogo, ta taoba UN agency for Palestinian refugees (UNRWA) odongtar Chris Gunness-ia shia liasü. (Maneni tapak 8 nung...)

Russia-i Ukraine tesem balala amakdang nisung 3 tepset: Zelenskyy Kyiv, Aami/June 06 (Agencies): Russia-i drone aser missile jenti amshia Ukraine yimtiba aser linük tesem balala nung Hokulbarnep amak, ta ketdangsür temi ashi. Iba mapang nisung asem tepset aser 49 yiru, ta Ukraine Tir Volodymyr Zelenskyy-i ashi. Anünglen nungi amakba ya Kyiv aser Lutsk yimti aser linük north-west tsütsü Ternopil region amala nung tenük yoker amakba liasü. Ukraine-i tawa Russian airbases amakba nung telangzüba agütsütsü ta Russia Tir Vladimir Putin-i US Tir Donald Trump dang tekumdangtsü ashiba sülen Hokulbarnep amakba ya alitsü. Zelenskyy-i Hokulbarnü social media X nung, "America, Europe aser alima nung aliba nisung ajak külemi Russia ajungshia iba rara anendaktsütsü mapangji tangya lir," ta shia liasü. Trump-i Russia ajungshitsü memulungba indanga pai tera kongshia ashi. "Nisung kari majungshira aser nisung takum tali agitsü rara nem mapang tali agütsüra, ibaji parnoka dena aliba aser par khureta lir. Asenoki tasü ita inyaktsüla," ta Zelenskyy-i zülua liasü. Tang tashinung nisung asem asüba jangjaogo aser parnok ajak Ukraine indang state emergency services nung inyaker lir, ta pai ashi. Iba mapang Russia-i drones 400 dak tema aser missiles 40 dak tema amshi, aser nisung yirurtem tali akumtsü akok ta ashi. Iba dang jelia sangdong ka nung Kyiv mayor Vitali Klitschko-ia linük yimtiba nung nisung pezü tepset ta shia liasü. Metro tracks raksatsüba ajanga yimti indang train system nung tetsükdaktsü ajurua Kyiv nung air raid alerts agüja liasü. Kyiv nung nisung meyrirjang aika anisüngzüik makai ali telung nung tejenokdak yanglua alidak ghonda ishika jenoka liasü. Ukraine ketdangsür temi ashiba agi, Hokulbarnep amakba nung cruise missiles 38 densema lir, aser Ukraine-i Deobarnü "Spider's Web" operation agiba mapang amshiba missiles den sako lir. Kharkiv, Sumy aser Luhansk nunga air raid alerts liasü. Ternopil indang military chief Vyacheslav Negoda-i ashiba agi, Hokulbarnü amakba ama anünglen nungi tanü liasü.

Tashinung ozü region sashia amakba mali. Ternpoli mayor Igor Polishchuk-ia yangji nisung pongu yiru aser ki, school ki aser sorkar indang ki o jen raksatsüba lir ta shia liasü. Lutsk nung drones 15 aser missiles trok amshia amakba nung nisung pongu yiru, ta mayor Ihor Polishchuk-i ashi. Kasa mapang Russia tesem balala aser occupied Crimea nung yasüng air defences ajanga Ukraine nunger meyong drones 174 khazüka yok, ta Russian defence ministry ajanga ashir. Black Sea nung Neptune anti-ship cruise missiles raksatsü, ta ministry ajanga ashi. Kyiv-i long-range drone amshia tesashitiba amakdang military bases pezü nung Russian warplane 40 shi raksatsür anogo ishika lir Russia-i tang tesüsa Ukraine amakba ya alitsü. SBU security service ajanga agiba Spider's Web operation nung drones 117 amshi aser Russia asoshi tongtipang cruise missile carriers shilem 34 nung amak, ta Zelenskyy-i shia liasü. Ita tetenzüklen Russia aser Ukraine tsüngta Istanbul nung yimjung asoshi ajurtepa jembitep, saka telemtetba tajung kata monguteti senden tembanga liasü. Russia-i "unconditional ceasefire" magizük ta Ukraine nunger yimjung ken o jembirtemi ashir, koba Kyiv aser US densema Western allies temi akhangba tongtipang ka lir. Russian teloki front line tesem kar nung anogo ana mesüra asem merarai alitsü sentong benok, ta ashi saka iba dak alia osang tejangja magütsü. Bodhbarnü ghonda ka dak jia phone ajanga jembidang, Ukraine-i tawa Russian airbases amakba kanga sashia langzütsü ta Putin-i nangzüka liasü, ta US Tir Trump-i ashi. Ukraine-i amakba nung telangzüba agüja mitkar temi mera agitsü asadanger, ta Moscow-i taoba mapanga shia liasü. Taoba hopta Trump-i Putine nem hopta ana züngzüktsür ama liasü aser Ukraine nung yimjung alitsü meranga inyaktepba nung Putin-i mesüshira US-i Russia nem telangzüba agütsüba melenshitsü, ta amokmerena

GOVERNMENT OF NAGALANDSTATE COUNCIL OF EDUCATIONAL RESEARCH & TRAININGNAGALAND: KOHIMA

NO.SCERT/SBTE/PSTE/Notice/1/2010-11/ Dated Kohima the June 2025.

ADVERTISEMENT

Admission for Pre-service candidate to the 2-Year Diploma in Elementary Education (D.El.Ed)Application is invited from intending candidates for undergoing the 2 -Year Diploma in Elementary Education (D.El.Ed) under SCERT Nagaland, Kohima for the academic session 2025-2027.

Eligibility Criteria:-

- Candidates should have qualified 12thgrade from a recognized Board/Council/University by obtaining atleast 50 % mark in aggregate,5 % relaxable for SC/ST.
- The minimum age limit is 18 years and maximum age is 28 years, relaxable upto 5 years for SC/ST only.
- The selection procedure will be based strictly on Merit in the interview and subject to availability of seats in each Institute.
- Candidate can apply in any one of the following Institutes.

1. DIET-Chiechama	2. DIET- Dimapur	3. DIET- Mokokchung
4. DIET- Mon	5. DIET-Pfutsero	6. DIET- Tuensang
7. DIET-Wokha	8. DIET-Zunheboto	9. St.Paul Institute of Teacher Education-Phesama
- Admission forms can be downloaded from SCERT website (scert.nagaland.gov.in)
- The form, along with necessary documents should be submitted in the respective Institutes on or before 15th July 2025.
- Issue of forms - 9th June to 30th June 2025.
- Date of Oral Interview - 22nd July & 23rd July 2025.
- Declaration of Result - 24th July 2025.
- Date of Admission - 25th July - 31st July 2025.
- Classes starts on - 5th August 2025.

(KEVIRALE-Ü KERHUO)Director & SecretarySCERT:SBTENagaland, Kohima

GOVERNMENT OF NAGALANDDIRECTORATE OF HEALTH & FAMILY WELFARENAGALAND:: KOHIMA.

No.DHFW-5/D.Pharm/Part-II/2014/1920-22 Dated, Kohima 5th June 2025

Advertisement

As per Government Approval Vide Order No.HFW(A)-9/18/21/257/Dated, Kohima the 23rdMay'2025. Applications are invited from the local candidates to undergo Diploma in Pharmacy course for the academic session 2025 at RIPSAT, Agartala. The last date for submission of application form 30th June 2025. Short listing criteria and other details are as follows:

- 5 (Five) Nos. of Seats available.
- Applicant should have cleared HSSLC (10+2) in Science Academic Stream with minimum 45% in case of SC/ST candidates with Physics, Chemistry & Mathematics (PCM), Physics, Chemistry, Biology (PCB) or any other equivalent qualifications approved by the Pharmacy Council of India.
- All relevant documents: HSLC & HSSLC Admit card, Mark sheet, Certificates, SC/ST Certificates, Indigenous Certificate, one recent Passport size photo, should be enclosed along with the application with complete address and contact no.
- The maximum age limit is 25 years as on 1st June 2025.
- Application Form can be downloaded from the Department website: nagahealth.nagaland.gov.in
- Last date of submission of Application forms will be on 30th June 2025. Duly filled in application in hard copy along with requisite supporting documents should be submitted in Room No. 210 (Training Section) along with Rs. 200/- as processing fee.
- Selection will be done based on Academic Merit Marks.

Sd/- DR. MERENINLA SENLEM
Director & HOD,
Directorate of Health & Family Welfare,
Nagaland: Kohima.

GOVERNMENT OF NAGALANDDIRECTORATE OF TECHNICAL EDUCATIONNAGALAND: KOHIMA

Dated, Kohima the 6th June 2025

NOTIFICATION

NO.DTE/SCTE/ITI/70/2023-24: Interested ITI Pass out students who wish to pursue Diploma Engineering courses for Academic 2025-26 through Lateral Entry under the State run Polytechnics are hereby invited to collect the Application Form from Directorate of Technical Education during office hour'sw.e.f10thJune 2025. The form may also be downloaded from the official website https://dte.nagaland.gov.in.The last date for submission of filled form is 27th June,2025.

(Er. VIPULHOU LHOUNGU)Director

SUPREME COURT OF INDIA

RECRUITMENT FOR THE POSTS OF SENIOR COURT ASSISTANT-CUM-SENIOR PROGRAMMER AND JUNIOR COURT ASSISTANT-CUM-JUNIOR PROGRAMMER

Applications from eligible candidates are invited for selection for appointment to 6 posts of Senior Court Assistant-cum-Senior Programmer and 20 posts of Junior Court Assistant-cum-Junior Programmer placed in level 8 and level 6 of pay matrix with initial basic pay of Rs.47,600/- and Rs.35,400/- respectively plus other allowances as admissible under the rules. The qualifications and other eligibility conditions for the said posts can be downloaded from Supreme Court website: www.sci.gov.in under the Head 'Recruitment'. The last date for submission of application form is 27.06.2025.

Place: New Delhi (T.I. Rajput),
Date: 05/06/2025 Registrar (HR)

Nagaland Olympic Association-i ayongzüka "Olympic Day" amungtsü

Nations League: Spain aser Portugal final asayatsü Stuttgart, Aami/June 06 (Agencies): Nations League semi-final nung Lamine Yamal-i goal ana agüja Spain-i France madak 5-4 agi takok angu.

Brehostibar aonung iba asaya nung arishi küm 17 tain Yamal-i France nung kulemi asayar Desire Doue aser Ousmane Dembele nung dang tajungba asayateta Deobarnü Portugal den final asayatsü jenjang ajangzüka liasü.

Bodhbarnü Portugal yagi iba asayamung ayonger Germany madak 2-1 agi takok ngua liasü.

Brehostibarnü asaya ya lanur football asayar tajungtem tsüngta asayaba amai lir, saka Paris Saint-Germain-i Honibarnü Munich nung Champions League akokba ajanga France nung

tetsüng taretba kumdaktsü amai liasü, kechiaser PSG nungi Doue aser Dembele nungeri alaka masayatet.

Ibai Nations League tenzüker goal timtiba agütsüba asaya ka liasü, saka France nung goal pezü nungi asem bo Yamala-i 5-1 jungtsür lia agütsü.

"Asaya tajung liasü. Tatem nung tera anasatapa liasü, saka onoki kanga junga asaya aser takok angutsü langa lir," ta Yamal-i ashi.

Asaya tenzüker minute 22 buba nung mezügbuba goal ya Spain nung Nico Williams-i agüja liasü. Minute asem lir Mikel Merino-i goal ka agüja 2-0 kumtsü.

France nung Theo Hernandez-i metsüba crossbar nung tsükdak aser iba sülen Doue, Mbappe aser Dembele nungeri goal agütsütsü merangba Spain goalkeeper

Unai Simon-i kanga junga nokdangtet.

Spain yagi mashi mapang goal agütsütettsü ama asaya liasü. Real Madrid defender Dean Huijsen-i goal agütsüogo ta bilema liasü, saka offside liasü.

Minute 54 buba nung Adrien Rabiot-i Yamal dak aibelena penalty ka mena, koba Yamal-i aibelen mesüi yokteta 3-0 akum. Minute ka lir Pedri-i goal ka agüja liasü.

Pedro Porro-i tai menaba yong Mbappe-i penalty metsüa France asoshi goal ka agütsü, saka Yamal-i langzüa 5-1 kumdaktsü.

Substitute Rayan Cherki-i menur süaka France asoshi goal ka agütsü aser Spain defender Daniel Vivian-i par tsütsü goal ka agüja liasü. Iba sülen ano Randal Kolo Muani-i asaya tatemtsü anasa goal ka agüja liasü.

David Beckham nem 'Sir' nüngja agütsütsü



London, Aami/June 06 (Agencies): England nung football asayar tejen, David Beckham nem taruba hopta King's Birthday Honours list nung züngoktsü, ta Hokulbarnü osang ka ajanga ashi.

Arishi küm 50 tain Beckham-i football asaya nung mapa balala inyakba aser charity taruba hopta King Charles III ajanga 'Sir' nüngja agütsütsü. Beckham, shibai Three Lions asoshi international jenjang nung asaya 1115 nung asaya lir, pa taoba Manchester United manager Sir Alex Ferguson aser tennis asayar takotet Andy Murray densema British nung saisapong otsü nung tenüng tulutem rongnung züngoksemtsü.

Beckham ya 2003 küm officer of the Order of the British Empire (OBE) shim aser iba sülen pa kinungtsü aser taoba Spice Girls telok nungi Victoria nem fashion industry nung inyakba asoshi kasa nüngja agüja liasü.

Beckham ya 2005 nungi UNICEF goodwill ambassador lir aser King's Foundation nunga shilem ka ama tarutsü putu asoshi nature indang awareness

agütsüba nung yariteper. Taoba mapang Manchester United nungi asaya alisang Beckham ajanga United Kingdom-i Olympics bener arutsü merangba atema iba konang ya 2012 nung agütsütsü liasü, saka tax memonok ta tai tongloktsüba yong soita ayu, saka iba ken o tatem nung agiena liasü.

Ferguson kübok Beckham-i Manchester United nungi asayadang Premier League title trokben aser UEFA Champions Trophy khen bena liasü.

Ajisüaka 2003 küm Ferguson den mangatettep adokba sülen Beckham ya Real Madrid dangi ao, kong pa 2007 tashi asaya aser iba sülen LA Galaxy dangi ao.

Beckham ya season ana AC Milan nung asayar ano PSG dangi meyip aser yangji lia pa asaya nungi anisüngzüik. Pai asaya balala nung goal 127 tashi agütsüteta lir.

Beckham-i 2014 küm MLS nungi Inter Miami alizüknüba tejangraba sangdong aser pai Lionel Messi, Luis Suarez, Sergio Busquets aser Jordi Alba nung aniokba sülen iba telok ya kanga renlokdaaktsüogo.

Indonesia Open: Chirag Shetty aser Satwiksairaj Rankireddy tsükogo

Jakarta, Aami/June 06 (Agencies): India nung temaba jenjang nung badminton asayar Chirag Shetty aser Satwiksairaj Rankireddy na Indonesia Open Super 100 asayamung nungi Hokulbarnü tsükogo. Tena ya Jakarta nung quarterfinals asayadang Malaysia nung Man Wei Chong aser Tee Kai Wun nati tsükdaktsü.

Minute 40 asayaba nung Shetty aser Reddy na Chong aser Wun nati 19-21, 16-21 agi akok, anungji Jakarta nung India nung asayar kata mali kumogo.

Küm tetenzüklen Malaysia

Masters aser Indonesia Masters asayamung takok ngur alisang Man aser Wee nati India nung ana ya amokbanger asaya liasü.

India nung ana ya defensive discipline agi anünga liasü aser aiben jilok-pangloka aser aritepa aibelen menaa liasü.

Satwik-i net nung anaben züklokja Malaysia nung ana ya 9-7 agi temaba akum. Iba sülen Malaysia nung ana ya 11-9 agi jenjang temaba kuma liasü.


Iba sülen Satwik aser Chirag nati score level 11-11 kumdaktsü, saka Man aser Tee

nati asendenshir 15-12 agi temaba akum. Malaysia nung ana yagi net nung anaben aibelena 17-17 akum, saka India nung ana yagi iba maangka magitet.

Tee-i kanga kera yokba ajanga 19-17 akum aser Chirag-ia point ka angu. Ajisüaka Satwik-i ano net nung aibelen ka süa Malaysia nung nem game point agütsü, aser parnoki aji nguteta mezüng set tembang.

Tesem melentepba sülena India nung Satwik aser Chirag nati balaka tajungba mesayateti tamakok ajurua liasü.

French Open: Musetti yirur, Alcaraz final tongogo



Paris, Aami/June 06 (Agencies): Defending Champion Carlos Alcaraz aser Lorenzo Musetti na French Open semi-final asayadang set pezü buba nung Musetti yirur asaya nungi anena Alcaraz iba asayamung final tanaben tongtetogo.

Spain nung seed tanabuba nung alisang Alcaraz ya 4-6 7-6 (7-3) 6-0 2-0 agi temaba sür lia Italy nung major final mezügbuba atongtsü nükjidong nung asayasang Musetti ya iba tennis asayamung nungi anentsüsa akum.

"Ibai tim masü. Ni takok

nguner, saka yamai masü," ta Alcaraz-i ashi.

Tena tsüngta set asembuba tatemi eight seed Musetti ya tepi nung timtem ajurua anepalutsüsa akum.

"Ni serve aodang kü tetsüng abelen tashi tera ajema akum aser tamajungba dang akum," ta arishi küm 23 tain Musetti-i ashi.

"Ni telemtetba shidak agiogo, saka ni aginüba ama masü."

Taküm ATP Tour nung tena ya clay-court nung kanga junga asaya arua liasü.

Ajisüaka arishi küm 22 tain Alcaraz-i teka amteta asaya amokbanga liasü.

Pezüben Grand slam

champion bena alisang Alcaraz, shibai taoba küm Roland Garros mezügbuba koka lir, pai Deobarnü final nung Novak Djokovic mesüra Jannik Sinner ajurutsü.

Arishi küm 38 tain Serbia nung sixth seed Djokovic yagi iba ama asayamung tulu takok marok 25 buba ngutettsü meranga asayatar, aser pai Hokulbarnü semi final nung Italy nung world number one Sinner den asayatsü.

Djokovic aser Sinner asayaba ya reprangtsü, ta Alcaraz-ia shiogo.

Tang season clay-court tebur asaya nung Alcaraz ya yakbang nung lir, aser Musetti ya pa sülen asaya 23 nungi 19 koker liasü.

Roland Garros matongdang Italy nungba ya clay-court Masters asemprong nung semi-finals tonga asayateta liasü.

French Open masüadang tang season nung Alcaraz-i Musetti madak Monte Carlo aser Rome Open nunga takok ngua liasü.

BENDANGLI OSANG : Tapak 7 nungi...

Israel-i Gaza nung Hamas anemba telok...

"Civilian tem shiruru ama atsü atsübanga alidak anidena kiset shiruru amai tepset," ta pai ashi.

Brehostibarnü Palestine nung nisung 52 tepset, ta mozüki ka nungi ashi. Khan Younis nung aliba Nasser Hospital nunga nisung 31 tasü mang bener aru aser Gaza City kübok al-Ahli Arab assert al-Shifa mozüki tem nunga nisung 21 yua lir ta ashi.

Gaza City nung aliba al-Ahli Hospital dang Baptist Hospital

ta ajar, kong Israel-i amakdang osangbener pezü tepseta lir.

Palestinian news agency Wafa ajanga ashiba agi, Khan Younis nung nisung pongu asü, north tsütsü Beit Lahiya anüolen nisung pezü asü, Gaza City south tsütsü ka asü aser central Gaza nung aliba Bureij anasa tanur ka yiru.

Wadi Gaza anasa aid centre tonga aotsü meranga Palestine nung dak Israel sepaitemi injang khaloktsü, ta Wafa ajangasa ashi.

BILEMDANGANG

"Na pela alitsü nü tangatetba nung keta lir."